


# კავკასიის ეკონომიკის ყოველთვიური მიმოხილვა

დეკემბერი 2023



## ეკონომიკური ზრდა



**2023 წლის პირველი ათი თვის მდგომარეობით კავკასიის ეკონომიკის ზრდა 3.9%-ია. გასულ წელს კავკასიის ზრდა 7.8%-ს აღწევდა. ეკონომიკური ზრდის ტემპის კლება რუსეთიდან ადამიანური და ფინანსური კაპიტალის ნაკადების შემცირებასა და წინა წელთან შედარებით ნავთობის დაბალ ფასებს უკავშირდება.**


**✚** მიმდინარე წლის პირველ ათ თვეში საქართველოს ეკონომიკა 6.6%-ით გაიზარდა, ხოლო წინა თვეს ზრდის ტემპი 6.6%-ს შეადგენდა. ზრდაში მნიშვნელოვანი წვლილი საფინანსო, სავაჭრო, ტრანსპორტი და დასაწყობების სექტორებმა შეიტანა. კლების ტენდენცია დაფიქსირდა დამამუშავებელი მრეწველობის და უძრავი ქონების სექტორებში.

**🇧🇪** კავკასიის რეგიონში ზრდის ყველაზე მაღალი ტემპით სომხეთი გამოირჩევა. მიმდინარე წლის პირველ ათ თვეში სომხეთის ეკონომიკა 9.2%-ით გაიზარდა. უშუალოდ ოქტომბერში, წინა წლის იმავე თვესთან შედარებით, ეკონომიკა 6%-ით გაფართოვდა. სომხეთის ეკონომიკურ ზრდაში განსაკუთრებული წვლილი სავაჭრო სექტორს აქვს, რომელიც ამ პერიოდში 23.3%-ით მოიმატა, ხოლო სამშენებლო დარგი კი - 16.4% -ით.

**🇦🇲** რეგიონში ზრდის ყველაზე დაბალი ტემპი აზერბაიჯანში დაფიქსირდა. 2023 წლის პირველ ათ თვეში აზერბაიჯანის ეკონომიკა 0.5%-ით გაიზარდა. აზერბაიჯანის ეკონომიკის 37.6% ნავთობისა და გაზის ინდუსტრიას უკავია. ენერგორესურსების ფასი გასული წლის ანალოგიურ პერიოდთან შედარებით შემცირებულია. ნავთობისა და გაზის ინდუსტრიის გარეშე ზრდის მაჩვენებელი 3.1% იყო.



## ინფლაცია და მონეტარული პოლიტიკა



**ინფლაციის მაჩვენებელი კავკასიის რეგიონში ეკონომიკური ზრდის ტენდენციებს იმეორებს. საუკეთესო მდგომარეობა სომხეთშია, ხოლო ყველაზე ცუდი მაჩვენებელი აზერბაიჯანში ფიქსირდება.**

✚ საქართველოში მიმდინარე წელს ინფლაციის ტემპი, წინა წელთან შედარებით, შემცირებულია. ნოემბერში სამომხმარებლო ფასების წლიურმა ზრდამ 0.1% შეადგინა. ნოემბრის ინფლაციაში მაღალი წვლილი ალკოჰოლური სასმელების და თამბაქოს ფასებმა შეიტანა, რომელიც 5.1%-ით გაიზარდა. თუმცა, რიგ სექტორებში ფასების კლება დაფიქსირდა, მათ შორის, ჯანდაცვის სერვისების ფასები ყველაზე მეტით, 4.3%-ით შემცირდა. ამ ფონზე ცენტრალურმა ბანკმა ბოლო გადაწყვეტილებით რეფინანსირების განაკვეთი უცვლელად 10%-ზე შენარჩუნდა.

🇦🇲 რეგიონში ყველაზე დაბალი ინფლაციით სომხეთი გამოირჩევა. მიმდინარე წლის ნოემბერში სამომხმარებლო ფასების წლიური კლება 0.5% იყო. ყველაზე მაღალი, 8.3%-იანი ზრდა ალკოჰოლისა და თამბაქოს ჯგუფში დაფიქსირდა, ხოლო 4.4%-იანი კლება სურსათის ფასებზე. ეს კი სამომხმარებლო ფასების ძირითადი ნაწილია. სომხეთის ცენტრალურმა ბანკმა მონეტარული პოლიტიკის შემსუბუქება მიმდინარე წელს დაიწყო. ბოლო გადაწყვეტილებით რეფინანსირების განაკვეთი 9.5%-მდე შემცირდა.

🇦🇷 აზერბაიჯანში ინფლაციის ტემპი კლების მიუხედავად, შედარებით მაღალ ნიშნულზე რჩება. მიმდინარე წლის ნოემბერში სამომხმარებლო ფასების წლიურმა ზრდამ 2.6% შეადგინა. ოქტომბერში ინფლაცია 3.9% იყო. აზერბაიჯანი რეგიონში შედარებით მაღალი ინფლაციით წინა პერიოდებშიც გამოირჩეოდა. მიუხედავად ამისა, აზერბაიჯანის ცენტრალური ბანკი პოლიტიკის გამკაცრებისგან თავს იკავებს. მეტიც, ნოემბრის დასაწყისში მონეტარული პოლიტიკის განაკვეთი 8.5%-მდე შემცირდა.